

N O R W E G I A.

est praefectus in Staffanger, qui praeter praefecturam huius loci, etiam praefecturas sequentes administrat, nempe in *Carmen*, *Ryfolko*, *Iaren*, & *Dalenne*. Tertius arcis praefectus in arce Bergenli Bergae habitat, cuius imperio subsunt praefecturae *Sundhornleen*, *Noordhornleen*, *Soghne*, *Sumfjoerde*, *Noorfjoerde*, &c.

Berga.

Berga, emporium Norwegiae celeberrimum, nomen habet à germanica dictione *Bergen* / quod vel abscondere, vel conservare significat, nam is locus nautis post superata maris pericula saepe tutum portum refugiumque praebuit. Germanorum ac Hanseaticae societatis mercatorum residentia amplissima est, & ad mercaturam maximè accommodata. Quarta arx est *Nidrosia*, à *Nidero* fluvio & *rosa*, quod templi nomen est, sic dicta. Metroplis fuit totius Norwegiae, & sedes regis Norwegiae, nunc in vici formam redacta. Huic Praefecturae subsunt praefectus in *Noordmeer*, *Surendal*, & *Sundal*, praefectus insularum *Hiteren*, *Foosserleen*, *Stadsbugden* & *Noordbugden*: praefectus in *Nomendal*: praefectus in *Iaderoyen* & *Snaassen*: praefectus in *Schoordael*, praefectus locorum *Strinden*, *Selboe*, *Leenstrand*, *Bynes*, *Schoenien*; praefectus in *Guldael*, *Meldael*, *Orckedael*, *Singejogen*, *Rendeboe*, & *Opdael*. praeter quos praefectus quoque est, qui bonorum ecclesiasticorum & monasterialium curam habet. Gubernator in *Salten* septem sub se praefecturas habet: *Heyligland*, *Salten*, *Laffoeten*, *Westrollen*, *Andenes*, *Sennien*, & *Tromso*. Praefectus arcis *Wardhusia* toti Finmarchiae jus dicit, quae ipsa praefectum habet aestivum, & hybernium. Amplissimum illius litoris Norwegici tractum in Zona frigida usque ad Russiae fines gubernat. Atque haec quidem praefecturae omnes dioecesi Nidrosianam constituunt.

Finmarchia.

Norwegiae ad septentrionem adjacet Finmarchia, vulgo dicta *Taakemarch*, quae hoc proprium habet, quod regio ejus in propria dominia ac possessiones, uti alibi fit, distincta non sit, sed omnibus obvia, primique occupantis. Qui autem primus terrae tractum occupat, ejus non quidem proprietatem dominiumque, sed usum fructum solummodo habet. Finni, qui ad mare piscatum abeunt, facile quas semel elegerunt sedes permutant. Nam consumptis in quotidianos ignes circumcirca vicinis lignis arboribusque alio concedunt. Et plerique eorum qui aestivo tempore in littore maris piscatum abeunt, brumali tempore mediterranea loca repetunt. Verum, qui in insulis habitant & locis littoralibus, in *Heymeland* / aliisque eadem loca aestate hyemeque inhabitant, nec vagi sunt: suasque habent Ecclesias & pastores in *Troms*, *Su-*

roy, *Maggero*, & alibi. Sero autem in hac loca commigratum fuit, nam anno Domini 890, uti ex *Osteri* patet narratione, ad septentrionalem tractum *Heylighlandiae*, sive Terrae sanctae, habitatum littus non fuit. Incolae praecipuum quaestum ex piscatura aselli majoris faciunt, qui Bergam mittitur. Solebant hi Finni littorales sive maritimi vectigal pendere tribus Dominis, Russiae Domino, Suecorum regi, & Norwegiae regi: uti hodie adhuc pendunt Finni mediterranei. Verum cum certo foedere jus istud vectigalium Russus cesserit Sueco, Suecus vero regi Daniae, qui idem Norwegiae rex est, soli huic regi annum vectigal solvunt: nempe praeter piscium decimas singulae familiae dalerum imperialem. Misere vivunt, & quicquid piscando lucrantur, abliguriunt potando. Quos *Fieldfinnis* ^{Fieldfinnis} vocant, populi sunt Lappionum genti non absimiles. Suos olim uti & universa Norwegia, habuerunt regulos, quos *Fieldekonga* & *Nessékonga* vocitabant. Nempe eos, qui rusticis & montanorum campestriumque locorum incolis imperitabant, *Fielkis Konga* nominabant: eos vero, qui propius ad littora imperium tenebant, *Nessa konga*: quales erant *Lindesnes*, *Scutenes*, *Stat*, & *Kynnes*. Pelles ferarum, quas venatione sibi comparant, Suecis quam Norwegis vendere malunt, ne his decimasolvere cogantur. Duos annuos mercatus habent in provincia, quam *Iemptenland* vocant; alterum festo S. Catharinae, quem celebrant in australi parte Hamerdaliae, alterum Dominica Palmarum, in septentrionali plaga Hamerdaliae; quo loci mercaturam exercent cum Suecis, mercesque advehunt tergora, pellesque hinnulorum, alciū, luporum, vulpium & urforum; proque his mercibus recipiunt vinum adustum, farinam, pannum, aliaque ad victum & amictum necessaria. Neque enim in his regionibus aut ferunt aut metunt, solum ex animalium agrestium captura victitantes.

Basilicae in Finmarchia numerantur decem: nempe prima *Wardhusia*, quae duo sub se habet sacella, alterum in *Vadsoen*, alterum in *Kibergh*: secunda est basilica *Ommegangs* dicta: tertia *Schottinbergs*: quarta *Kielings*, quae sacellum sub se habet in *Hellenes*: quinta *Thunes*: sexta *Hiellemfens*, ad quam sacellum pertinet: septima *Ingens*: octava *Meisfverds* in *Suroy*, nona *Sorffverd*: decima *Loppers*. quae annotata sunt à pastore quodam, qui aliquot ibi annis ministerio functus fuit. Norwegiae, Finmarchiaeque delineatio, Sueciae conjuncta est. Apud Fieldfinnos templa non sunt.